

11 MAY 2000

Mahathir-Umno (Budaya)

MAHATHIR INGATKAN "MELAYU BERADA" JANGAN AMAL BUDAYA TIDAK BERTERIMA KASIH

KUALA LUMPUR, 11 Mei (Bernama) -- Datuk Seri Dr Mahathir Mohamad berkata kejayaan Dasar Ekonomi Baru (DEB) jelas telah menjadikan orang Melayu kini lebih berada tetapi kesan negatifnya ialah ia juga membentuk budaya baru tidak berterima kasih dan menggigit tangan orang yang berbudi di kalangan mereka.

Perdana Menteri berkata ada orang yang mengesyorkan supaya Melayu ini bersikap kurang ajar, yang mendapat sambutan, dan dari situ berkembanglah pendapat bahawa tidak perlu ada perasaan terhutang budi sampai mati.

"Jangan ada langsung perasaan terhutang budi...jangan berterima kasih kepada orang yang menolong kita. Memaki mereka dan memburuk-burukkan mereka tidak salah kerana yang diperlukan hanyalah bersyukur kepada Tuhan," kata Presiden Umno ketika berucap merasmikan Perhimpunan Agung Umno ke-54 di sini, hari ini.

Menurutnya gagasan golongan itu ialah kononnya nikmat dan rezeki yang didapati bukan daripada orang yang menyampaikannya kerana jika tidak orang itu, orang lain yang akan menyampaikannya.

Beliau berkata keadaan itu samalah dengan menganjurkan tidak perlu berterima kasih kepada Nabi Muhammad SAW kerana jika tidak Nabi Muhammad, orang lain akan diutuskan untuk menyampaikan agama Islam, lalu tidak perlulah mengagung-agungkan Nabi Muhammad SAW sebaliknya memadai dengan bersyukur kepada Allah.

Dr Mahathir berkata itulah antara budaya sesetengah Melayu bandar sekarang.

Budaya itu, katanya, diburukkan lagi oleh orang politik yang berkepentingan yang menganjurkan supaya jangan berterima kasih kerana jika mereka berkuasa mereka juga akan memberikan yang sama atau lebih daripada itu kepada rakyat.

Perdana Menteri juga berkata golongan itu menyuruh rakyat menolak sahaja orang yang telah berbudi kepada mereka dan juga supaya rakyat menggigit tangan mereka yang telah berbudi itu.

"Gunakanlah apa sahaja untuk menimbulkan kebencian kepada orang yang berbudi kepada kita... surat layang, akhbar, Internet, semuanya boleh digunakan.

"Labelkan orang yang dimusuhi dengan gelaran yang buruk kerana dengan cara ini akan meningkatkan lagi kebencian kepada orang tertentu. Mahazalim, Mahafiraun. Sukakah kita kepada orang yang zalim, firaun? Tentu tidak," katanya.

Menurutnya tidak ada perasaan yang lebih memuaskan nafsu daripada membenci, maka politik pembangunan pun diganti dengan politik benci.

Perdana Menteri berkata itulah perubahan-perubahan yang sudah berlaku kepada sebahagian daripada orang Melayu dan Bumiputera lain hasil daripada kejayaan Umno memaju dan membangunkan mereka.

"Apakah Umno harus menamatkan Dasar Ekonomi Baru supaya orang Melayu kembali menderita dan dengan itu kembali insaf dan bersatupadu semula?" tanya beliau.

Dr Mahathir berkata kejayaan Umno menyatupadukan orang Melayu di pertengahan abad ke-20 ialah kerana orang Melayu merasa terancam menghadapi bahaya hilang negara dan hilang bangsa, dan bahaya dari luar itu menekan orang Melayu, sehingga mereka terpaksa merapatkan barisan melalui Umno untuk mempertahankan diri.

Orang Melayu tidak lagi menganggap diri mereka sebagai orang Kedah, orang Perak, orang Pulau Pinang atau orang Johor dan seterusnya tetapi buat pertama kalinya mereka secara bulat dan padu menganggap diri mereka sebagai orang Melayu.

"Hanya sebagai orang Melayu yang bersatu padu sahaja barulah mereka

dapat menyelamatkan diri dan harta pusaka warisan mereka," katanya.

Dr Mahathir berkata jika dahulu Umno berjaya menyatupadukan orang Melayu, apakah Umno kali ini tidak boleh menyatupadukan mereka semula?

"Sebenarnya kita tidak tahu. Mungkin boleh, mungkin tidak. Tetapi boleh atau tidak, kita mesti cuba. Itu adalah semangat Umno... kita tidak boleh mudah kecewa dan menyerah kalah.

"Kita bertanggungjawab kepada bangsa Melayu. Sama ada orang Melayu akan menyambutnya atau tidak, tanggungjawab kita mestilah kita pikul. Jika gagal apabila dicuba kita mesti cuba lagi," katanya.

Menurut presiden Umno itu, sebenarnya percubaan telahpun dimulakan dan jika perubahan dalam budaya Melayu yang menyebabkan mereka mula menggelongsor ke arah kemusnahan, maka langkah yang perlu diambil ialah mencuba mencipta dan menyemai budaya baru yang lebih mampu melawan nafsu dan mengatasi cabaran hidup sebagai penduduk bandar yang mewah.

Beliau berkata benteng yang terkuat sekali ialah agama Islam dengan nilai-nilai murninya tetapi malangnya budaya yang terbentuk apabila Nabi Muhammad SAW membawa Islam kepada Arab jahiliah sudah diketepikan oleh kebanyakan orang Islam.

Dr Mahathir berkata persaudaraan dan perpaduan dalam Islam tidak lagi diamalkan oleh orang Islam, bahkan di mana-mana sahaja mereka bermusuhan sesama sendiri dan sanggup bersubahat dengan musuh-musuh Islam untuk mengalahkan orang yang seagama dengan mereka.

"Di Malaysia, ini juga sudah berlaku. Sudah ada orang Melayu yang membenarkan diri mereka dihasut oleh musuh supaya menggagalkan usaha untuk memaju dan mengembalikan kecemerlangan tamadun Melayu dan Islam," katanya.

Perdana Menteri juga mengingatkan bahaya muslihat musuh-musuh Islam ialah menggalakkan pembentukan puak-puak yang bertentangan pendapat berkenaan agama, yang akan mewujudkan permusuhan sesama Islam, yang akan memusnahkan diri mereka sendiri.

Menurutnya, kumpulan-kumpulan serpihan di kalangan orang Islam dipuji dan diberi galakan supaya menyerang kumpulan tunjang yang majoriti sehingga segala usaha oleh kumpulan majoriti untuk memajukan orang Islam akan dituduh tidak Islam.

"Sibuk dengan mempertahankan keIslaman mereka, kumpulan majoriti tidak dapat menumpu kepada pembangunan orang Islam dan akhirnya gagallah usaha orang Islam untuk menguasai segala ilmu dan kecekapan yang membolehkan mereka bersaing dengan bangsa-bangsa lain," katanya.

Dr Mahathir berkata sudah berkali-kali percubaan dibuat oleh orang Islam untuk membangunkan umat Islam, tetapi telah digagalkan oleh puak serpihan yang dipengaruhi dan disokong oleh musuh-musuh Islam.

"Hari ini di Malaysia kita melihat bagaimana galakan dan sokongan diberi kepada parti serpihan supaya menentang parti tunjang majoriti orang Islam... media Barat dan pihak tertentu cuba membayangkan PAS sebagai parti sederhana yang perlu disokong oleh bukan Islam untuk menjatuhkan kerajaan pimpinan Umno," katanya.

Beliau berkata jika kerana usaha musuh-musuh Islam itu, sokongan kepada Umno merosot, maka Umno tidak dapat menumpu kepada kemajuan orang Melayu/Islam, bahkan mungkin Umno akan cuba menjadi lebih Islam daripada PAS, menolak apa yang PAS cap sebagai sekular sehingga Malaysia terus mundur dan lemah.

Malaysia juga tidak lagi dapat menegur Barat dan mengutarakan penganiayaan terhadap umat Islam di Bosnia, Kosovo, Sudan, Iraq dan Iran, katanya, sambil menekankan dengan itu Barat tentu merasa lega kerana kini hanya Malaysia sahaja yang sanggup mengkritik Barat.

"Tugas Umno ialah cuba menyeru orang Melayu kembali kepada persaudaraan dan perpaduan seperti yang diajar oleh Islam supaya strategi mereka yang benci kepada orang Islam tidak akan berjaya," katanya, yang mahu parti-parti serpihan orang Islam disedarkan bahawa mereka sudah diperalatkan oleh musuh-musuh Islam.

"Insyallah, jika Umno terus berusaha menyuarakan yang benar, akhirnya walaupun mungkin tidak ramai, akan ada juga mereka yang akan menolak

kemungkaran dan menerima kebenaran," katanya.

-- BERNAMA

MNY RON